

雪峯詩草

賦

雪峯詩草

灤縣裴古榮雪峯

咏姚烈婦

烈婦姚家蒿坨姚金之妻。榆子林莊李姓之女。以殉夫而死。從容就義。其志皎然。(文稿中有傳)

搏搏大地逢陽九。尙義敦倫事何有。只我重觀杞國風。傷心爲記姚家婦。梅花一樹小園春。冰作心腸玉是身。性質幽閒吟絮女。容華莊麗浣紗人。盈盈二八懷春歲。乍咏周南之子句。行饁家貧敢怨勞。挽車質弱不辭力。娉娉何須說短長。甘言厚色事高堂。蒸梨未見郎多怒。捉杖偏逢嫂太狂。幾番受辱惟垂淚。呷語囂聲何敢對。紅豆新辭不許



歌。鉛華舊事都成廢。相憐最是畫眉人。密意衷情許暗陳。共臥牛衣
終可樂。代聞鷄唱不生嗔。增憂無柰郎多病。庭議驚分雙舞鳳。脈脈
芳心意敢他。慊慊病骨情偏重。三更湯藥五更茶。禱佛求仙日幾家。
嘆我已教心似燼。報君惟剩淚如麻。彌留叔寶猶要信。別鶴分鸞探口
問。一死爲酬我本能。暫生相送君休恨。死死生生感倍多。積言不減
楚江波。鰥鵠欲有重相聚。萱蔭偏教無奈何。紛紛會葬東皋路。正是
情儂斷魂處。馬鬣封來豈忍看。蝸廬歸去不成哭。魂去魂來事有無。
佳人血淚染羅襦。歸甯正是千秋別。舉止爭疑一日殊。阿爺錯解嬌兒
意。孤燕愁他紅縷繫。豔質方如萼上花。沾泥肯效池頭絮。豈略芳心
比鐵堅。一腔熱血久銘天。已拚珠玉長同穴。肯抱琵琶別上船。玉堂

蘭鏡不成寶。焚燼楮錢心如擣。三尺黃墟不見人。幾番春雨初萌草。
一哭荒涼最慘情。分明便是訣今生。立心不轉真非石。矢志隨夫豈爲
名。梁頭三尺冰紋練。繫罷逡巡應浩歎。鐵意疑心我尙悲。風鬟霧鬢
誰曾見。蒿垞東去草芘芘。亂樹蒼烟弔古風。題首新詩歌常哭，孤碑
高屹夕陽中。

秋夜讀書

煙雲無計駐流年。重爲悲秋一黯然。悵望伊人未得志。淒涼子夜不成
眠。分崩餘地難爲國。休戚前途豈在天。時方開華盛頓會議聞說中原。多戰骨。挑
燈更讀大招篇。

重過馬姑堂遺址有感

七古

民國初元梁鑑之先生始就馬姑堂大寺遺址創立第三高小學校余時以幼童濫竽其中未二旬因故退學迨後戊己二歲海寇猖獗高小遷於胡鎮此地遂成廢址犁爲禾黍有年矣今因事南遊重經故址感而賦此憶昔我年方十四。負笈擔簦來此地。師長方殷創作勞。兒童豈有凌雲志。國旗五色中門飄。前殿峨峨佛骨高。曲徑逶迤通後院。牆陰凌雜亂蓬蒿。同班濟濟多英傑。分宿二齋依序列。兩叢芍藥方含苞。一樹薔薇舞黃雪。校南校北多芳草。心驚到眼春光好。野塘積水喧青蛙。禪院僧墳莫稽考。牆東有柳色青青。牆裡歌謠牆外聽。靈雨連朝澆野

麥。狂風永夜撼虛樵。同羣笑謔皆成偶。就中更結同心友。幾度談心
月下遊。連番戲競庭前走。爾時舉動皆天機。長恨平生此願違。無奈
慈親思愛子。終移寸草映春暉。楊花如雪鋪歸路。控蹇匆匆日將暮。
蓬萊回首卽仙山。屢望層雲傾遠慕。賦命由來敢怨天。遭家不造痛綿
綿。長沉恨海三千里。永隔名場二十年。羸馬輕車重訪舊。跼蹐曠野
心增疚。百畝平禾分外青。一溪春水無聊皺。吁嗟乎滄海桑田轉眼新
。空懷往事悵前塵。我猶綠野迤邐客。誰是青雲得意人。

歲暮行

時難年荒迷覺路。夙逋才了愁租賦。方謂晴冬時序長。荏苒年華遂云

暮。孤子當家瞬三載。停辛佇苦誰堪訴。治家差與治國同。常愧兼籌
難並顧。用人空切使人難。養性無功動交惡。高田種稻低田禾。水旱
災蝗更紛互。讀書志雄飛。少年頭角嶄焉露。凌雲意氣迅無前。
立業建功羞亥步。蓼莪一讀泣哀哀。覆餗從茲有深懼。息心永作田間
人。爭食何分雞與鶩。天寒日暮雪霏霏。烏鴉翔集啼庭樹。人不如鳥
滋長嘆。悔恨從前曾未悟。中宵展轉不成眠。明朝往祭村南墓。草木
零落其如此。痛淚頻揮豈無故。自泣自語呼雙親。吾心尙未改其素。
田園猶守舊時規。親眷雍和無抵牾。重泉聚晤將何形。空令生者永孺
慕。歸來惻惻不成歡。長慨人生異遭遇。我願化鶴飛千年。十洲三島
雲間住。不願草草作勞人。年年苦被春風誤。

赴灤遇雪口占四絕

鷄榮蟲辱老事。冒雪衝風得得來。我似三春花信使。千林萬樹一時開。

應是羣山見我羞。漫天垂霧久難收。灤城風景清奇甚。無限瑤宮接玉樓。

纔聽晨鐘便束裝。竭來只是太匆忙。良師益友論文事。空向心頭熱一場。

浮生久矣嘆勞薪。歸去來兮有夙因。萬里長途鋪素毯。應知天亦愛詩人。

遊太和殿懷古

崔巍宮殿蔚丹霞。蕭颯秋風感歲華。專制燄銷龍虎氣。蓬蒿生滿帝王家。珠輝寶座春無主。月照瓊林夜有鴉。六百年來機軸地。古今興廢總堪嗟。

前落第詩

誰爲劉蕡叩九閭。黯然歸去愧柴門。楚弓乃令他人得。和璧宜從再獻論。永嘆書城淪恨海。難求劍影刻舟痕。嘔心自古惟文戰。多少英雄淚暗吞。

文章絢爛水明霞。也作辭枝腸斷花。奴僕寧無私地笑。親朋儘有老來嗟。青衿入座人人喜。紅帛掄才字字瑕。贏得緇塵蒙傲骨。長安市上看烏紗。

家山在望淚潛揮。季子先愁不下機。圖霸齊姜曾勸駕。數奇李廣竟空歸。難禁稚女牽裾問。反羨閒禽得意飛。抱卵營巢終有志。願爲馮婦赫天威。

萬般由命信難憑。重理殘書感倍增。一戰竟成穿縞弩。十年可愧讀書燈。丹心未許庸流識。白眼先從委巷憎。聯步五雲期匪遠。青天笑破最高層。

後落第詩

葉公何事走真龍。回首長安恨鎖胸。竟是田禽无下澤。敢誇射隼在高
壩。鷹揚志氣當頭棒。豹變生涯清夜鐘。慰到親朋非戰罪。自家躋蹠
更難容。

同儕忽爾判龍豬。竟學陶公愛故廬。反娣適占歸妹卦。總交羞致巨源
書。祖生竟讓鞭先著。司馬徒勞賦子虛。就令桑榆能補憾。應知有痛
在三餘。

俗人毀譽莫悲歡。松柏堅貞競歲寒。定慮自能忘物我。平心豈復有波
瀾。不羞柳惠三番黜。願葆汾陽一寸丹。謫任室人譏任客。英雄努力

且加餐。

歸來理竹釣前汀。可喜沙鷗眼尙青。綠野豈無書帶草。蒼天猶挂少微星。門稀俗士人相棄。家有餘歡粟滿瓶。落拓窮途還自慰。書生事業在傳經。

哭徐潤齋先生

哀哀一哭痛人琴。淚灑長河情更深。切望尙疑天可補。噩占竟應井無禽。請纓未了終軍志。集感彌傷衛玠心。三十年華埋地底。難從蒼昊問來今。

英雄胡亦有沉疴。束手相看奈若何。絕頂聰明天儘妒。過人才略世難

多。方期後日飛雲會。竟唱朝陽薤露歌。不忍須臾君遽死。可憐寶劍十年磨。

津門秋色最淒清。困頓他鄉病蛻輕。原隰旣哀來萼弟。河澗尙義有蘭兄。可羞世態浮雲變。一任風波海水生。到底未談心上事。恐君傷是死時情。

相攜患難性情真。抵足屯邛每細陳。不讓古人敦節義。敢辭末路有艱辛。一杯曠野啼嬌女。滿篋遺書痛老親。此去九原成隔世。可知故友泣蕭晨。

重至天津念亡友徐潤齋有感

同舟人去赴泉台。重至天津劇可哀。草莽早懷憂國志。蜩螗未展濟時才。推心結友空遺恨。掬淚招魂豈復來。宇宙茫茫原一瞬。人生到此念全灰。

游京師北海松坡圖書館瞻松坡遺像有感

畫壁遺容尙赫然。勳名常震亞東天。豈知戢武南山日。尙有昌文北海年。救國傷身心自苦。屠龍喋血訣誰傳。我來亦有終軍志。欲爇芬香

黯自憐。

詩方考
講武堂

登橫山大覺寺卽景

十年重此陟崔嵬。水遠山明望眼開。終古幾人能大覺。願將心地質如來。

大好山河作戰場。連年烽火痛彫亡。男兒自有真肝胆。怪語驚天夜起芒。

花枝繞院若將迎。前度劉郎劇有情。禮化變遷風物異。尙餘古碣紀昇平。

山深廟古易通神。虔熱心香性已真。此去紅塵勤洗濯。再來莫作自羞人。

感懷

京華六月太炎蒸。蝥伏茅齋汗似繩。結客每揮題鳳筆。求名羞對集螢
燈。存心事業淡於水。照眼人情寒若冰。尺蠖屈伸惟信命。鵬飛萬里
竟何曾。

濟濟紛趨勢力場。是誰巨眼矐孫陽。應如拂瓦飛蠅客。不立飄風疾雨
鄉。俠客窮途賣肝胆。男兒季世繫倫常。青天白日昭然揭。須信人天
一葦航。

養氣功夫缺十年。磨來鐵硯信將穿。儘知揚子炎炎句。願結禪公寂寂
緣。秦鏡照窮天下象。漢書悟澈意中玄。墨家利害原同貫。應識治心
者種田。

無聊出處五羊皮。願向高林借一枝。君實簡書成史業。仲翔戎馬作經

師。誓修烈烈前賢志。不愧昭昭白日馳。海內黎元愁水火。匹夫有責更難辭。

游法源寺口占

十年燕市踏紅塵。古刹皈依了夙因。達道惟欣歡喜佛。來賓多是綺羅人。尙留石壁昭前史。難問菩提證後身。趺坐西階心萬古。槐花滿地草如茵。

無題

十年京洛逐浮名。枯臥茅齋百感并。多謝東鄰慕臣意。勞人不識曲中

情。

此生所遇既艱屯。應愧前生有夙因。因果相尋原可懼。折花不是愛花人。

平生興趣最孤寒。雪裡梅花結古歡。亦對東風酌杯酒。穠桃郁李不曾看。

今人輒說古人奇。節義當前漫不持。一念猶疑千古錯。懸崖勒馬是男兒。

紀實

離家五百里。夜夜夢雙親。雙親歿十年。尙念膝下人。有時指導我。

作事惟恭純。有時喜歌我。撫育惟慈仁。顏貌如生時。夢境日各新。我愛夢中景。歛歛不欲晨。父母在堂時。盡孝曾未真。風木痛何及。怛切常悲辛。白楊蕭蕭鳴。此恨終千春。推親愛我意。飲食當自珍。○我弟十六齡。論年已非小。愧我教不忠。學問百不曉。前與我來函。塗字如鴉鳥。我持此函讀。喜氣出樹杪。秉賦更平實。天生義儀表。行止肖先親。後看愈了了。報親終無方。黃泉事幽杳。友弟望得宜。誠敬終慚少。○我姊長十年。其家惟困窮。粥粥育羣女。前年方得雄。每稱先親言。殷殷誠我躬。規我舉止疎。憂我倉廩空。思親意更專。居積性則同。相對述遺志。泣下常濛濛。慚此誠摯意。當勤墳典功。潦倒長安市。家門竟不隆。○盜賊滿乾坤。黎民苦生活。食肉先

擇肥。紛紛肆攘奪。居者懷百憂。走者幸逃脫。俯仰皆荆榛。天地不
空闊。遷徙既甚難。進退常震懼。游子在他鄉。寸心寄天末。回念出
門時。悠然易裘葛。吁嗟亂世民。痛楚常如割。

留別業師李證剛先生

聖門原未棄愚狂。幸坐春風意自芳。卅載作人渾不似。連番問學益無
疆。鄭玄敢詡爲高足。孟喜深慚述古章。留別倍增依戀志。惟期勤學
報門牆。

詠史

漢有匡稚圭。困頓爲人傭。立志惜寸陰。晚年成儒宗。人生尙志耳。自餒爲凡庸。境遇豈不佳。故步常自封。簣土永不息。可爲山百重。所以豪傑士。恥爲鄉里容。○陽明聖域人。良知自省克。當時儒林中。翕然崇明德。主靜雖近禪。濟世本不忒。末流雖近濫。知恥至通國。季世惟黨同。紛紛相案劾。一若亡朱明。斯人負深慝。當時政治壞。危機早四匿。豈彼講學人。而能孕流賊。○男兒重道義。顛沛守其經。雨雪何雱雱。松柏終青青。慨古讀前史。失道嗟桓靈。李固奸諂死。巢覆卵弗甯。王生何許人。杵臼矢自銘。放身江淮間。十年提酒瓶。當時獻遺孤。紫綬登王庭。權門豈不甘。顧自甘飄零。斯人不可見。千載有餘馨。○翰林歐陽公。高才爲顯仕。生乃有奇癖。謙和惟

愛士。一士登朝端。十年罹讒訾。羣小更交謗。困頓幾沒齒。平生言
聖賢。志趣乃如此。不與共羞辱。況復期生死。同爲世中人。當時惑
非是。釋演汝何故。涕泣不能止。○可法白屋人。古廟艱朝餐。忠毅
巧遇之。遽以加貂冠。平生憂國心。樹人爲中磐。一爲宦豎陷。肌肉
不復完。監獄進見時。私情弗能干。吾未見剛者。斯人何桓桓。冀北
馬千羣。選駿良獨難。得士如史公。庶亦足以觀。○優游人所怡。跋
涉衆所憚。平生矢朝日。旣死亦已渙。岷樵非常人。久要竟不叛。師
友萬里沒。風塵一身扞。日月爲三光。精語竟能貫。當時湘鄉侯。擊
節爲稱嘆。若木欲爲才。豈不慕楨幹。鄙哉翟公客。罷相一朝散。

入清華學校感賦

秋風搖落菊花開。高密傳經許特陪。駑馬自羞塵外影。焦桐還幸爨餘材。卞和獻璞連遭刖。賀監登梯一總裁。到底只關天道事。漫嗟歸去與歸來。

偶佳緒倍思親。撫育當年膝下身。上學喜聞鄰叟譽。廢書常累阿爺嗔。慈烏善哺成千古。乳燕哀鳴近十春。捧檄只今惟告墓。癡兒願作老成人。

良朋當日勸求名。萬里炎蒸赴玉京。鵬集遂成千載恨。鵬搏更誤十年程。人間否剝今看轉。天道蒼茫痛莫爭。斗酒隻鷄親致奠。可能笑領

似平生。

余初考清華由
徐潤齋君介紹

名園景物最清幽。小住翛然作隱流。偶望羣山朝帝闕。更傷風雨闇神州。五車讀破作何用。八口無依良足羞。攬轡澄清來日事。月明長嘯拭吳鉤。

和岳美中韻

冰輪愁被暗雲遮。誓舞龍泉斬白蛇。使酒十年能自省。立名千載惹人誇。求心有道終成哲。卒歲無衣未足嗟。他日海疆烽火定。翛然攜手話桑麻。

己巳年清明

青田綠柳又清明。南望家山百感生。述業雙親終古志。報恩游子十年情。亦知墓下悲無益。深悔堂前孝未誠。揮淚天涯心如擣。荒村惟聽拊兒聲。

輓王鶴鳴先生

朔風吹雪作瓊枝。遠寄瑤函慰別離。只我抱疴京邸日。正君易簣故園時。行年九十齊三樂。立志千秋忍百飢。奇特男兒原不忝。茫茫塵海少真知。一寒徹骨未辭貧。受盡窮途白眼新。患難獨肩情感衆。愚誠至友德通神。

分荆未忍傷同氣⑤ 撲棗何曾惱故鄰⑥ 子息艱難事病廢⑦ 極端成就可憐人

魔障傳來亦有名⑧ 衰年志趣尚崢嶸 樹碑梓里千里惠⑨ 修譜榆關兩度行
⑩ 餘日喜研經緯學⑪ 殘軀不畏虎狼兵⑫ 輪迴情事誰能說 欲識來生證此生⑬

少衰貧富兩相忘⑭ 促膝歡然話最長 脫俗遂爲三載契 超人共作十分狂 遺容肅穆猶加敬⑮ 病榻溫存痛未遑⑯ 楚些招魂悲莫補 春風野水更淒涼

●客冬尚有函件往來●列子天生萬物人爲實得爲人一樂也人分男女男爲貴得爲男二樂
●也有生而夭者今已九十三樂也●君爲莊中設訊房事毅然自任爭之有司卒得直●君爲
弟病遠禱於二百里外之景忠山其父在家感神賜夢●君與一弟析居卽係自己支配拮据不

勞親友而二弟無怨言①君東鄰有老寡婦乞食守節顛沛不奪君慕其高行卹之終身②君生四子皆不育妻病瘡癩十餘年以死③君平日所作之事多奇行故人皆呼爲魔障④君七十餘歲始將平生負債三千餘吊還清在村東購田一畝捨於村中爲義地立碑曰王攀桂所捨義地⑤君述父遺志修成家譜但族中多遷居關外者手中貧乏無力坐火車乃於五十七歲五十九歲二年兩下關東卒以六十歲將譜修成⑥君喜研天文之學⑦直奉戰役亂兵竄擾閩君以無財產無室家之老叟亦奮勇率衆招待可見急公好義⑧君感於輪迴之說操行旣甚高潔惟望得直於來世自於棺框上刻聯曰未識前生誰是我安知死後我爲誰額曰以我爲鑑⑨我年二十八歲家稱小康君年七十六歲而其貧初於安家莊相見卽甚相得⑩君照像遺余⑪當君未歿前曾有函致余自述病已危急余發函請王君文峯代表致問文峯因事未果而君遂卒

卽事

夫容塵俗到胸襟。絕磴函溪著意尋。六鬱渾忘還健體。千陶不躍見祥
金。荒林聽鳥閒中趣。古浦觀魚靜後心。春水東流無返浪。及是行樂
是良箴。

三月十六生日有感

先親四十方生我。撫愛常如掌上珍。只望衰年能返哺。何期中道邁窮
屯。勉承遺志心終戚。流落天涯草又新。行義衛生時自惕。他年好見
九京人。

自題小影

十萬年間暫有身。個中形態幾曾真。平生湖海英雄氣。轉笑留侯似婦人。

夜登梭西北小山

閒來曳杖行。夜景逾幽清。林樹似加密。春風微作聲。野蛙歌不歇。村火遠猶明。興廢空前古。登高萬念平。

頤和園懷古

鑄錯銷金卅六州。閣中帝子不知愁。文梁畫棟千雲起。鶴渚鷗汀一望收。神采未辭翔砌鳳。陰霾先黯鎮湖牛。顯陵東去留長恨。揮涕新亭痛故侯。

雜感

蝸牛乘雨出。簇簇擁道周。誤踏聲砰然。殼碎涎亦流。憫此微物命。舉趾不敢投。拾置叢草中。雙角何斛斛。物生固匪易。見殺更非尤。偶發同仁心。全活豈一儔。茫茫天地間。萬物同沉浮。何日掃幾心。厚俗追千秋。

羣鳥先人興。飛噪在叢樹。不知談何情。其樂乃無度。晨起聞羣聲。

慨然發深慕。人生能幾時。轉眼異朝暮。奔走寰宇中。勞勞亦多務。一念遽然喜。一念憮然怒。以欲遂生求。因羞竟起妒。不知物外情。泫然若朝露。惟能葆天真。逆旅客暫住。

良朋遠寄書。規我聞譽喜。自喜我天性。因之屢招毀。始知澹然心。應與古鏡比。百物靡不照。無物全其美。寵辱紛沓來。神志如止水。逍遙百念外。事過影遂已。嗟我狂躁性。高賢徒仰企。有病自難醫。叢尤衆交訾。何時悟上乘。時行復時止。求得放心歸。學勇先知恥。

游圓明園故址

燕子雙雙掠葦田。舊時宮殿址依然。阿房一炬成焦土。帝室繁華絕可

憐。

自箴

言語惟宜節。行爲總要徐。氣清秋後月。心靜海中魚。萬事淡爲味。百年謙自居。翛然名利外。古意在庭除。

由北平返家留別諸同學

十旬師弟竟情親。才學疏迂自返身。落拓長安爲曲士。馳驅塵海愧勞薪。庸愚但望賢加教。譎陋何曾德及人。歸去故園風尚樸。任呼牛馬作天民。

懷 感庚午七月

廿年何處覓金臺。長鋏高歌劇可哀。忽聽秋聲夜中起。燈花炯炯與誰開。

鷄聲高下滿關河。遍地瘡痍奈若何。大景西流無返志。書生徒抱魯陽戈。

淡無人處自芬芳。誰識梅花是國香。鄧尉山頭千萬樹。烟封雨鎖更悲涼。

烟波一艇願終酬。雲水閒綸不釣愁。擬騁遙原千里目。世間何處最高樓。

哭石子貞先生己巳年冬月

傳來噩耗自郵筒。揮淚長安遠哭公。憂樂常關天下計。清高無忝昔賢風。推仁身後傷隨會。倒屣賓筵感孔融。扶植綱常人逝矣。傷心知己卅年中。①

狼虎紛紛肆爪牙。願憑正氣辟妖邪。賈生痛哭情難已。屈子狂吟世所嗟。庸衆得時惟攬利。寒儒憂國久忘家。②。布衾敝缺黔婁死。長慨賢愚共有涯。

擔囊到處訪交游。道義箴規肯暫休。疾惡如讎夷聖隘。③。中流作砥楚人欸。誓扶公理終難直。環伺強鄰恨未收。此日鄉邦失矜式。生芻一

東奠前修。

華堂一別病綿延。忠恕相期志浩然。救世肝腸仍自熱。預留遺囑不求傳。時移裘葛傷難復。理隔幽明痛解懸。食雨修途應惕厲。寸心先白墓碑前。

●公自余年十八歲時見余文卽過相期許●公每年教讀所得不過五十餘金。曾以三十餘金拍電力爭國是。家人爲之炊絕。弗顧也。●公平生聞人不善不屑與之談。方剛不阿。因之屢招世忌●公病時占榮往視遺囑云平生熱心救國無補涓埃。歎在寸心。蓋棺有痛願諸朋好勿傳余身後之名。則九原亦可稍安。

登紫金山玉皇閣

辛未三月

玉皇高閣一憑臨。楊柳扶疎春已深。無數遠山來眼底。幾枝紅杏發牆陰。廿年革面成奇局。萬里乘風悔壯心。看破浮生渾底事。此來不復感升沉。

灤河岸放歌

辛未四月

今我來此忝授書。山川依舊夢模糊。廿年故友歸黃土。水道西遷山未殊。水邊撐棹幾漁叟。沙頭振翅多飛鳧。風帆來往常如織。獨坐看山到日晡。閒心細數洲邊石。紫白紅黃雜穢缺。光陰荏苒悠然過。及時無業嗟非夫。願言從此歸故廬。南疇常把犁與鋤。春來雨足多佳趣。秋後糧收樂有餘。不爭利與名。名利皆虛無。不犯貪與嗔。貪嗔皆頑。

愚。春風秋月陶然度。人生不樂將何如。神州鼎沸難甯居。幾多大盜稽天誅。水深火熱益悲痛。嗟我何能爲隱徒。誓將提我劍洪盧。頑龍兇鱷恣剪屠。河山滌淨無塵滓。南北東西皆坦途。民生既裕我亦樂。歸來一笑爲牧芻。荒林每聽羣鳴鳥。靜渚常觀獨逝魚。此心更質灤江水。波上沙鷗卽故吾。

庚午年登橫山寺並遊老道士墓

十六年間逝水過。攀躋重訪舊烟蘿。牽驢遺像猶懸壁。手植蒼松半拱柯。牛讀道書居古刹。沒留荒塚枕山阿。宗徒共話當年事。不覺中懷感慨多。

離家

游子將遠行。未別先黯然。百感填我膺。中夜不能眠。展轉復反側。戚戚憂來煎。妻孥秉燈燭。慰我亦有言。良人志四方。內外難兩全。惟當慎所事。毋復多繫牽。默坐愧此語。家務誰仔肩。遺囑久難忘。神傷惟自憐。

次女方五齡。聰慧有逸趣。教之讀方字。承歡常繞膝。前者我赴灤。自言父趕集。長女辯其訛。力爭繼以泣。安眠襁被中。不知父遠去。趕集今千里。再逢寒暑易。今朝夢醒時。惘惘應如昔。人生離別情。最重天倫意。

阿弟年弱冠。心如三四齡。雖辨菽與麥。性如水中萍。讀書不解意。治家不守經。淪作市井人。困處如拘囹。古詩亦有言。在原惟鶴鶻。臨別往視之。致訓涕先零。勉其勤服務。戒其判渭涇。君品如能端。我心方可甯。執手野踟躕。門戶傷伶仃。

征車一發軔。去矣不復留。家人簇望之。揮涕不可收。花犬亦有情。送我村西頭。拾塊逐犬還。作勢不忍投。鄉黨咸嗟咨。駢立環道周。或視遠行順。爲國展嘉猷。或言出門難。何苦多營求。游子中懷傷。此心良悠悠。蘇季當年歸。夾道擁八騶。男兒貴行義。貧賤何足羞。

游醴泉寺謁范文正公祠堂

倫常遭際最艱辛。苦誦當年夜達晨。憂國初非干祿日。如公不愧讀書人。捫牌古砌還增慕。采藻寒泉可侑神。第一名儒標宋史。典型未遠景先民。（醴泉寺卽范公幼年讀書處。寺東有醴泉。水甘冽。四時不竭。）

登會仙山最高峯（此山之高約九里。登之可望鄒平全境。）
四塞蒼烟莽莽昏。最高峯頂叩天閭。村邊綠隴排棋局。眼底羣山拱子孫。千里壯游甯不快。十年浩氣固長存。空庭槐柏槎枝老。應識飛鴻雪爪痕。（余與同游伴侶七人。曾在古柏及古槐下攝影。）

三月十六生日感賦

當年父母盼添丁。湯餅筵開樂滿庭。親歿十年游海岱。又逢生日淚潛零。

有感

學道慚無力，情瀾湧怒潮；病來縈腦蒂，火更灼心苗；夜靜風威猛，房空燭影搖；何時若明鏡，與物不相邀。

郊原漫游

節序推移任自然，浮生草草屆中年，存心愧說英雄氣，濟世爭論去住緣；明月滿林懷故里，青山當牖企高賢；朝來一陣西風急，黃葉相隨下麥田。

題 畫

蒼松生山中，歲寒不變節，獨立高峯下，翛然耐霜雪，男兒須守身，立志希前哲，貧困不足憂，富達亦無涅，人欲正橫流，吾懷方鬱結。救世具婆心，耿耿肝腸熱。

題 畫

萬古青松樹，生在高山旁；下有茅草廬，修竹環蒼蒼。廬中一奇士，氣度何軒昂；盱衡空當世，舉足凌八荒。長嘯讀前史，寶劍生光芒；黎民得喚咻，吾志斯永康。裊裊浮雲飛，朝夕自迴翔；翛然任天化，隨遇安常其。

和林烈敷先生原韻

九州到處留鴻爪，早識賢豪骨格奇，大漠風塵渾不靖，漫天氛祲益愁思，盜國幾人爲巨憝，誅心無術痛分支，西涼舊憩甘棠樹，應有遺民好護持。

廿載閱牆真鑄錯，苞桑誰信尙成叢，逋公詩得山川氣，介子功高道路

中；江左夷吾猶未老，神州華胄豈終窮；執鞭未遂平生願，敬和泱泱大國風。

訪蔡先生

專誠來訪道，不遇竟空歸；孤鶴自高舉，閒雲無定飛；春風滿庭樹，殘雪滅明暉；展讀瓊瑤集，知音世所稀。

題畫

水邊幾株樹，蒼蔚蔭榆柳，樹下幾間屋，茅蓋甕爲牖；中有高人居，日飲一斗酒，飲酒亦不醉，顛沛見操守；長劍埽八荒，鴻仁覆九有，

但願斯民康，不求印挂肘，崢嶸身後名，齊物亦芻狗，惟剩一顆心，
光明貫牛斗。

遊雍齒墓

在長山縣

丁公雍齒家相望，訪古悽然感慨長；救死竟能恩不報，封侯應識恨難
忘；分羹俎上真梟獍，烹狗宮中卽虎狼；恩怨從來易顛倒，相交休用
熱心腸。

靈聖鄉留別

連朝風雨若侵尋，遂輟高堂單父琴；大化升沉原有數，閒雲去住本無

心；問天自省良何味，覆物由來寸亦陰；正義人心終不死，東山峻極北河深。

悲願當時在衆生，奔馳齊楚計縱橫；洗心革面朝相惕，格虎驅羊夜遠征；本爲黎元謀肝食，敢從老氏詡佳兵；粉榆子弟多忠健，行見花村犬不驚。

未先有術富斯民，每對鳩形愧意真；失業黔黎愁逐鹿，嬉遊童稚盡懸鵠；一身備直年年債，十載橫流處處貧；海嶠移屯誰獻策，應知患寡不需均。

南湖靈聖鎖烟霞，每到斯鄉如到家；捨諦無功蠶縛繭，他山有石鼠張牙；還來本分心如水，看作虛空鏡不花；案牘餘閒還命駕，招攜田叟

話桑麻。

夜過邯鄲

滄海正橫流，哀哉此羣生，瘡痍失軫恤，蠻觸方交爭；男兒發悲願，敢有遺世情，仗劍走千里，不爲求功名；得失自有命，開濟難必成，惻隱存一念，清夜彌陀聲；能所本幻夢，親故皆繁英，曠觀空宇宙，肝胆爲誰傾；夜過邯鄲道，正圓斜月明；對月念今古，慷慨意難平。

又口占一絕

秋風殘夜月如銀，車過邯鄲感最真；萬里封侯迷夢寤，可憐難作太平民。

移家

惻怛復懷惶，全家去故鄉，地角與天涯，川途阻且長，乍見阿母來，
急前相扶將，萬感刺我心，熱淚流兩行；長途母甚疲，得憩境已良，
妻娣各欣喜，歷訴冒風霜；小兒兩周歲，奔走樂欲狂，左顧復右盼，
凌亂呼爺娘；我見衆人樂，更加身被創，追思我先人，中夜不能忘。
昔我先曾祖，致力在畎畝；常爲東鄰傭，經歷甚困苦。我祖最艱卓，
精勤禦外侮；興訟十九年，卒能拓田土。祖母甚劬勞，晝作夜績補；
當我童稚時，歷訴不遑處。賢能善持家，又有伯父母；勞力過傭工，
拮据爲佐輔。紡績轉星辰，耕耘冒風雨；勤儉好家風，村人尤指數。

我父性最厚，平生善吃虧；有犯常不校，妄人三反之。待友必純誠，生死志不移；懷族甚敦恕，溫和而有威。我母多憂慮，其生不逢時；早爲嗣續傷，晚愁兒輩飢。哀哉我鮮民，不造早流離，倏忽十六年，孺慕常懷其。

猶意未離家，往拜先人塚；低徊遊子心，蕭瑟嚴冬景。奠酒焚紙錢，中懷自惕悚；易簣有遺言，生氣尙懍懍。勉旃善持家，力田在南隴；游子背先志，慚愧發深省。春秋再佳節，誰復陳俎鼎；不孝罪難原，如喉常噎梗。

我兄同祖人，處境日艱困；我姊同母生，貧至莫能飯。我妹形甚癯，勞作身不健；雖然置我心，千里在方寸。故鄉風土情，念之覺幽悶；

兒時遊衍侶，雜沓恩與怨。我命亦何苦，積憂成大恨；安能得廣廈，一了平生願。

我家有園林，白楊何森森，上有烏鵲巢，啾啾聽好音。我家有菜圃，雜植易成陰，翠柳環繞之，池塘清且深。某房復某屋，曾費經營心，憬然在念慮，憧憧不可禁。安能飲醕酒，一醉忘古今，不復繫外緣，隨遇爲浮沉。

故居日漸忘，新居日漸安，抑鬱流離子，顧影成暫歡。千里布遙奠，痛甚傷肺肝，朋友慰解語，戚戚何能寬。春風正搖曳，百卉日紛繁，見彼得時榮，嗟我飲恨酸。人生本幻夢，血氣終自殫，我哀亦何爲，應作空了觀。何年悟大道，兩臂生羽翰，更因長風吹，時返故里看。

災區紀實詩

去年國歷十一月九日：予坐民船，由濟甯赴荷澤，因遇逆風，晚宿嘉祥；已十一點。十日：至大山頭西某村，遇險，舟幾覆；驚懼之情，至今思之心悸。晚宿鉅野。十一日：由鉅野西行，擱淺於某地，晚遇雨，宿於曠野。十二日：到龍固集，十三日到荷澤。今年國歷六月二十五日；又由濟寧坐車往荷澤。一路所見，皆顏垣枯樹，荒草飢民；中心慘然傷之！乃記去年行程，合以水災後一切之見聞，作災區紀實詩。

濟甯到曹州，二百四十里；汽車半日程，馬車兩日止。黃水忽橫流！千里無涯涘；我乃僱船行，招招仗舟子。掛帆遇東風，劃水直西駛；

疾如脫網魚，翩如避弋雉，午轉西南風，迎頭且逆水；篙楫忙不停，僅能進尺咫。呵呀復呵呀！水手累欲死；船中三女客，同在此包圍；便溺在船頭，包羞若病痞。亂世逃性命，誰復顧廉恥；傷哉流離民，乃與禽獸齒。新月正東升，萬點金波美，丙夜到嘉祥，席地臥如豕。昔見嘉祥城；建於青山陬！今行城門內，隄高身傴僂。十日方熹微，西過大山頭；船至中溜時，水力奔萬牛；暮地入險境！大樹枝相鉤；前進既不得，後退又難收；震撼復震撼！船側人啾啾！狂風助水勢，橫打成石尤；衆客面如土，微命付東流；舟子互諉過，叫罵爭啾啾；嘈雜呼救聲，我生成浮漚。幸有一舟子，馮河如龍蚪；挾繩登彼岸，使我得無憂。脫險一散步，始作更生謀；平生驚懼心，於此無復侔。

土人語此地，連日覆七舟；聞之咸咋舌，此命真幸留。

十一過鉅野，得風去如箭；指顧失遙村，翱翔越芳甸。豈知快意時，難收遂成變；攔淺平沙中，尋丈不得轉。舟如生萬根，百弄自安奠；苦矣三舟子，方策用來遍。勢蹙呼他舟，聲嘶目始見；救此殊未能，彼亦不能旋。最後無他方，下舟共拉絛；我跌黃水中，頭昏目且眩；滿身染淤泥，款乃聲一片，拖舟出平沙，時已用晚膳；四顧水茫茫，遂成奔而殿。

暮宿曠野中，雨急打篷響，飲水食乾饌，中心自悵惘。舟客二十人，艙面不盈丈；人上復有人，反側難俯仰。體氣及汗腥，難復說骯髒；篷漏水淋頭，風味自欣賞。當此困阨時，悠然發奇想；神堂行洗禮，

聖水澆佛掌；度脫成超人，吾今殆其儻？

去歲棹舟地，驅車今又過；大地龜背文，百里無田禾，杞柳生滿原，
萬木乾枝柯；棗樹無綠葉，槐榆萎頽波；高柳十一生，秃影成婆婆；
居民竟何食，采來柳葉多；百糞復百泡，聊以充飢疴。村村不見犬，
我謂隨滂沱；民言犬善泅，常能度漩渦；人苦無所食，用彼充飯籛。
嗚呼吃飯難！見者情自頗；餓鬼有地獄，昔傳五閻羅！君來災區遊，
此景可泣歌。

前村復後村，都化一堆土；哀此子遺民，支撐度風雨。用土復築牆，
幾日高成堵；牖小不如甕，屋仄等於罅，胼手胝足勞，又漸慶安宇。
各戶無圍牆，比鄰接步武；又歷創始艱，堂構繼其祖。我聞孟子言，

恆心須士伍；經濟太困窮，劫奪弄刀斧；我今行災區，目擊盡貧窶；以遇衡所爲，應呼君子府。

老翁六十七，駝背身生鱗；趨前與之言，未答先蹙顰；『去歲黃水來，運粟就高岷；歸來視我屋，已復委波淪。我甕爲人取，我稊亦俱泯；我生雖幸保，飢餓常兼旬；村人相聚遷，膠東爲災民；伊地易謀生，不愁食與薪；當時移遠方，哀哀泣四鄰；鄰甲昨歸來，有米復有銀；我老無妻兒，孤苦只一身；坐受黃水害，惻惻多酸辛』。聽畢老翁語，同情傷我神；四民多艱難，文王宜施仁。

我聞合龍門，徵料爲民病；縣府欲拖延，委員下嚴令。令迅比風霆，各縣怨苛政；僉謂挾勢來，氣燄一何橫。今來災區遊，如搖電影鏡；

屯遭艱脆情，幕幕一反映。無食復無居，淤土苗不盛；誰能見此景，仍復肝腸硬，迺知臨民者。措施貴得正；圖始自猶疑，樂成相愛敬。何日築金隄，黃流平如鏡；不復苦斯民，永作安瀾慶。



頁數	行數	誤	正
十六	四	(不真)	了
十八	一	作章惟恭純有時喜歡我	作事惟恭純有時喜歡我
同上	五	天生義儀表	天生美儀表
二一	八	精語竟能貫	精誠竟能貫
三二	八	擬騁逍遙千里目	擬騁遙原千里目
三四	三	食雨脩途應惕厲	風雨修途應惕厲
二	二	增憂無奈郎多病	增憂無奈郎多病
三九	三	捫牌古砌還增墓	牌應作碑
四八	一	忘人三反之	忘應作妄
同上	五	猶意未離家	意應作憶
五三	三	秃影成婆婆	下婆應作娑



贈者贈送

